

Sakspapir

Saksnr	Utvalg	Type	Dato
019/21	Kommunestyret	PS	18.02.2021

Saksbehandler	Arkiv	ArkivsakID
Ketil Tjore	FE-033	21/127

Elevar frå Åsheim skulekrins som går på skule i Austrheim

Framlegg til vedtak:

Austrheim kommunestyre ber Rådmannen gje tilbod til Rådmannen i Alver Kommune, om gratis skulegong til dei er ferdig på barneskulen, for elevane frå 1. – 6. klasse som allereie går på Kaland og som er heimehøyrande i Åsheim skulekrins. Kostnad for spesialundervisning, andre tilrettelagte tilbod samt skuleskyss vert dekkja av Alver kommune.

Austrheim kommunestyre ber rådmannen gje tilbod til rådmannen i Alver Kommune, og ordførar i Alver kommune, om gratis skulegang for elevane i Åsheim-krinsen til desse er ferdige på barneskulen. Dette gjeld for elevane frå 1. – 6. klasse som allereie går på Kaland og som er heimehøyrande i Åsheim skulekrins.

For elevar der det alt er gjort avtale om at dei skal fullføra skulegangen på Kaland, gjeld denne. Kostnad for spesialundervisning og andre tilrettelagte tilbod vert dekkja av Alver kommune. Kostnad for skuleskyss vert dekkja av Alver kommune.

Kommunestyret - 019/21 - 18.02.2021

KS - behandling:

Saksutgreiinga er utarbeidd av gruppeleiarane i Senterpartiet, KrF, Arbeidarpartiet og Høgre, samt ordførar. Saka var sendt ut til kommunestyret tysdag 16. februar. I møtet 18. februar vart det vedteke å setja saka på sakskartet, og den vart handsama.

Bjørn Inge Håland Dyrkolbotn (Sp) orienterte om bakgrunnen for saka.

Ordførar Per Lerøy (Ap) sa at samarbeidet alltid har vore godt mellom dei to kommunane, men ikkje i denne saka. Er ikkje redd for å trakka partifellar på tæra, men det er sider ved denne saka som ikkje er tilstrekkeleg belyst. Åsheim-krinsen med Hope og Kjeilen (og Litlås i Austrheim) er den krinsen som har bidratt til det store industrieventyret på Mongstad. Når foreldra ber om at desse elevane skal få gå på skule i Austrheim, er det historieløst å seia nei til dette, for det er offeret til denne krinsen

som har gjort industrireiseinga mogleg, som igjen har gitt velstand til heile regionen. Det har fungert slik i tiår etter tiår at born frå denne Hope og Kjeilen har fått plass i barnehage på Kaland, og så komme inn på barneskulen og evt. ungdomsskulen.

Austrheim har ikkje hindra noko innsyn med korleis elevane frå Lindåas/Alver har det på Kaland, ingen som har etterlyst å få komma til, ville fått innsyn i alt dei ville. Ser ikkje kvifor elevane i denne krinsen ikkje skal få gå på Kaland skule, og i alle fall når det no er tilbod om at dei skal få gå der gratis. Arbeidarpartiet si gruppe vil stå saman bak framlegget.

Varaordførar Inger Lise Brekke (H) sa at denne saka kjem opp på bakgrunn av ein førespurnad frå FAU, som kom den 28. januar. Brekke sa at det er leitt at ei justering av prisen fekk denne konsekvensen. Når det har blitt så mykje støy av saka, så er det mogleg å be Alver kommune om å la desse elevane gå på Kaland. Brekke spurte om rådmannen kan klargjera kva kostnad dette vil ha for Austrheim, om ein tek på seg dette for ein annan kommune sine innbyggjarar. Om kostnaden ikkje kan klargjerast no, ber Brekke om at det kjem opp i neste kommunestyre.

Rådmann Bjørnar Fjellhaug ba om at det vart presisert at dei elevane som det alt er avtale for skal fullføra, skal vera på den grunnsatsen som er avtala for dei, og at vedtaket no gjeld dei andre elevane. Fjellhaug sa vidare at han ikkje kan ikkje seia heilt kva som er kostnad, men det fører ikkje til deling av klassar, og vil gå inn i den ordinære drifta slik sett. Skal komma tilbake til kommunestyret om dette, men det som gjeld ekstra kostnader er spesialundervising, tilrettelagt undervisning og evt. skuleskyss.

Helge Dyrkolbotn (KrF) sa at om ein ikkje gjer noko no, så forsvinn desse elevane. Kan ikkje sjå at det vert ekstra lærarutgifter. Bør ta med i vedtaket dette med utgifter til skuleskyss. Må anten gjera det no, eller så er det for seint.

Reidar Øksnes (Sp) sa at han vil vera stolt om kommunestyret her kan setja den oppveksande slekt i førarsetet, og ta vare på den. Vil vera prisverdig om kommunestyret gjer eit slikt vedtak. I verste fall går ein glipp av dei midlane Austrheim i dag har fått per elev.

Ordførar Per Lerøy sa at ein ikkje går glipp av noko sidan desse midlane forsvinn til Lindås, kan vinna litt om PP-tiltak skal styrka fleire.

Monika Thorpe (Ap) sa at økonomien ikkje har vore så diskutert, her er det omsynet til borna og spørsmålet frå FAU som har vore det viktige. Det er borna som synest dette er ein stor innverknad i sin kvardag. Thorpe viste til vedtak i kommunestyret i Alver same dag om at vedtaket der (om at desse elevane skal over til skulane på Lindås) går til Statsforvaltar for lovlegkontroll.

Morten Sognnes (Høgre) sa at det viktige er at desse elevane får gå skuletida ut på Kaland. Økonomisk hadde ein misst desse midlane uansett, dette er heller ei handsrekning der ein kan få avslutta denne saka på ein god måte.

Ordførar Per Lerøy sa at transportkostnader må bakast inn i vedtaket. Meiner ein må gjera vedtak i dag, neste kommunestyret 8. april vert for seint.

Det vart tatt opp på skjerm eit felles framlegg til vedtak. Dette vart samrøystes vedteke.

KS - vedtak:

Austrheim kommunestyre ber rådmannen gje tilbod til rådmannen i Alver Kommune, og ordførar i

Alver kommune, om gratis skulegang for elevane i Åsheim-krinsen til desse er ferdige på barneskulen. Dette gjeld for elevane frå 1. – 6. klasse som allereie går på Kaland og som er heimehøyrande i Åsheim skulekrins.

For elevar der det alt er gjort avtale om at dei skal fullføra skulegangen på Kaland, gjeld denne.

Kostnad for spesialundervisning og andre tilrettelagte tilbod vert dekkja av Alver kommune.

Kostnad for skuleskyss vert dekkja av Alver kommune.

Saksopplysninger:

FAU ved Kaland barne- og ungdomsskule, sendte den 28.01.2021 eit brev til Kommunestyret i Austrheim angående elevane frå Åsheim skulekrins. I dette brevet ber FAU om at Austrheim kommune gir elevane frå 1. – 6. klasse som allereie går på Kaland og som er heimehøyrande i Alver, gratis skulegang til dei er ferdig på barneskulen. For skuleåret 2021/2022 vil dette gjelde 15 elevar.

Elevflyttinga er ei splittande sak i dette samfunnet, både på den eine og den andre sida av kommunegrensa. Kommunestyret i Austrheim ser at dette er viktig, både for elevar og foreldre, og ynskjer difor å kome dette ynskje i møte. Kommunestyret i Austrheim vil tilby elevane frå Åsheim skulekrins, som allereie går på skule i Austrheim, tilbod om å gjere ferdig barneskulen i Austrheim kommune, utan at dette kostar Alver kommune noko. Dette gjeld elevar som ynskjer det.